



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ  
ԿԱՐԳԱՎՈՐՈՂ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

16 փետրվարի 2017 թվականի №39Ա  
ք.Երևան

**«ԷՆԵՐԳԱԻՄՊԷՔՍ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ԿՈՂՄԻՑ ԷԼԵԿՏՐԱԿԱՆ  
ԷՆԵՐԳԻԱՅԻ ՓՈԽՀՈՍՔԵՐԻ ԻՐԱԿԱՆԱՑՄԱՆ ՄԱՍԻՆ**

Հիմք ընդունելով «Էներգետիկայի մասին» Հայաստանի Հանրապետության օրենքի 17-րդ հոդվածի 1-ին մասի «գ» կետը՝ Հայաստանի Հանրապետության հանրային ծառայությունները կարգավորող հանձնաժողովը որոշում է.

1. Սահմանել, որ՝

- 1) Հայաստանի Հանրապետության և Վրաստանի էլեկտրաէներգետիկական համակարգերի միջև էլեկտրական էներգիայի փոխհոսքերի (այսուհետ՝ Փոխհոսքեր) իրականացման գործառույթը վերապահվում է «ԷՆԵՐԳԱԻՄՊԷՔՍ» փակ բաժնետիրական ընկերությանը.
- 2) Փոխհոսքերի իրականացումն ապահովում է «Էլեկտրաէներգետիկական համակարգի օպերատոր» փակ բաժնետիրական ընկերությունը.
- 3) Փոխհոսքերն իրականացվում են Հայաստանի Հանրապետությունում էլեկտրական էներգիայի (հզորության) արտադրության՝ սակագնային տարվա համար պլանավորված, ռեժիմների բարելավման և էլեկտրաէներգետիկական համակարգում ծախսերի նվազեցման նպատակով.
- 4) Փոխհոսքերի իրականացման համար «ԷՆԵՐԳԱԻՄՊԷՔՍ» փակ բաժնետիրական ընկերությունը «Հայաստանի էլեկտրական ցանցեր» փակ բաժնետիրական ընկերության հետ կնքում է էլեկտրական էներգիայի փոխանակման (առուվաճառքի) պայմանագիր.
- 5) Փոխհոսքերի շրջանակում Վրաստան արտահանվող էլեկտրական էներգիան «ԷՆԵՐԳԱԻՄՊԷՔՍ» փակ բաժնետիրական ընկերությունը գնում է

«Հայաստանի էլեկտրական ցանցեր» փակ բաժնետիրական ընկերությունից՝ վճարելով «Երևանի ջերմաէլեկտրակենտրոն» փակ բաժնետիրական ընկերության կողմից առաքվող էլեկտրական էներգիայի (կՎտժ) համար սահմանված սակագնային դրույթով.

- 6) Փոխհոսքերի շրջանակում Վրաստանից ներկրվող էլեկրական էներգիան «ԷՆԵՐԳԱԻՍՊԵՔՍ» փակ բաժնետիրական ընկերությունը վաճառում է «Հայաստանի էլեկտրական ցանցեր» փակ բաժնետիրական ընկերությանը՝ «Երևանի ջերմաէլեկտրակենտրոն» փակ բաժնետիրական ընկերության կողմից առաքվող էլեկտրական էներգիայի (կՎտժ) համար սահմանված սակագնային դրույթով.
- 7) Փոխհոսքերի գործառույթի իրականացմամբ պայմանավորված՝ «ԷՆԵՐԳԱԻՍՊԵՔՍ» փակ բաժնետիրական ընկերության կրած ծախսերը փոխհատուցվում են «Հայաստանի էլեկտրական ցանցեր» փակ բաժնետիրական ընկերության կողմից՝ սույն կետի 4-րդ ենթակետի համաձայն կնքված պայմանագրի հիման վրա.
- 8) Փոխհոսքերի շրջանակում մատուցվող՝ էլեկտրական էներգիայի հաղորդման, էլեկտրաէներգետիկական համակարգի օպերատորի և հաշվարկային կենտրոնի ծառայությունները համարվում են էլեկտրաէներգետիկական ներքին շուկային մատուցվող ծառայություններ՝ այդ ծառայությունները մատուցողների և «Հայաստանի էլեկտրական ցանցեր» փակ բաժնետիրական ընկերության հետ կնքված համապատասխան պայմանագրերի շրջանակում.
- 9) Փոխհոսքերի շրջանակում «ԷՆԵՐԳԱԻՍՊԵՔՍ» և «Հայաստանի էլեկտրական ցանցեր» փակ բաժնետիրական ընկերությունների միջև էլեկտրական էներգիայի փոխանակության կետ է համարվում Հայաստանի Հանրապետության և Վրաստանի էլեկտրահաղորդման գծերի հատման կետը.
- 10) Փոխհոսքերի շրջանակում յուրաքանչյուր հաշվարկային ժամանակահատվածի համար «ԷՆԵՐԳԱԻՍՊԵՔՍ» փակ բաժնետիրական ընկերության կողմից ներքին շուկա առաքված և «Հայաստանի էլեկտրական ցանցեր» փակ բաժնետիրական ընկերության կողմից վճարման ենթակա, ինչպես նաև «Հայաստանի էլեկտրական ցանցեր» փակ բաժնետիրական ընկերության կողմից առաքված և «ԷՆԵՐԳԱԻՍՊԵՔՍ» փակ բաժնետիրական ընկերության

կողմից վճարման ենթակա էլեկտրական էներգիայի հաշվառումն  
իրականացնում է «Հաշվարկային կենտրոն» փակ բաժնետիրական  
ընկերությունը:

2. Սույն որոշումն ուժի մեջ է մտնում ստորագրման պահից:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝



Ռ. ՆԱԶԱՐՅԱՆ

ք. Երևան  
16 փետրվարի 2017թ.  
Ժամը 17<sup>00</sup>